

四庫全書

子部

# 欽定四庫全書

子部

山堂肆考卷百七十八

詳校官中書<sub>臣</sub>閔思毅

主事<sub>臣</sub>祁韻士履勛

總校官降調編修<sub>臣</sub>倉聖脉

校對官中書<sub>臣</sub>葉蘭

謄錄監生<sub>臣</sub>張護

欽定四庫全書

山堂肆考卷一百七十七

明 彭大翼 撰

器用

筆

釋名筆述也謂述事而書之也揚子刀不利筆不銛

宜加砥削之

拜中書令

韓愈毛穎傳穎中山人也秦始皇封諸管城號管城子

累拜中書令呼為中書君

封管城侯

文嵩作管城侯傳宣城毛元銳字文峯封管城侯又薛稷封筆為墨曹都統黑水郡王兼亳州刺史

蒙恬造

博物志秦蒙恬造筆又史記始皇令蒙恬與太子扶蘇築長城恬取中山兔毫造筆崔豹古今注牛亨問曰古有書契便應有筆世稱蒙恬造筆何也答曰自蒙恬始

作秦筆耳以柘木為管鹿毛為柱羊毛為被非兔毫竹管也非謂古無筆也

班超投

東漢班超投筆有萬里封侯之志

援筆寫圖

尚書中候玄龜負圖出周公援筆以時文寫之

置筆作論

東漢王充閑戶潛思戶牖牆壁各置刀筆著論衡八十

五篇

尚書給筆

史記司馬相如為天子賦游獵成奏之上許令尚書給筆札

宮妓呵筆

唐李白便殿草詔時天寒筆凍帝令宮妓十人各執牙筆呵之令白遞取書字

筆給一雙

漢書尚書令僕丞郎月給大筆一雙篆題曰北宮工作  
筆用三品

梁書元帝為湘東王時好著書嘗記錄忠臣義士及文  
章之美者筆有三品忠孝全者用金管書之德行精粹  
者用銀管書之文章瞻麗者用斑竹管書之

簪筆備問

漢書張安世持橐簪筆事孝武數十年注云近臣負橐  
簪筆以備顧問或有所記負橐以盛書也簪筆以筆簪

于首也

賜筆紀功

唐德宗在奉天與渾瑊無名官誥一千軸使募敢死之士又賜御筆一管當戰勝量功伐即署其名授之如不足即以筆書諸紳

寶跗

西京雜記漢制天子筆以錯寶為跗毛皆以秋兔之毫官司路扈為之又以雜寶為匣清異錄偽唐宜春王從



謙喜書札學晉二王楷法用宣城諸葛筆一枝酬以十金筆勁妙甲當時號為翹軒寶帚

### 銅牀

東宮舊事皇太子初拜給漆筆四枝銅博山筆牀副焉樹萱錄南朝呼筆管為牀梁文帝答徐摛書特設書幌下置筆牀筆四管為一牀或云筆牀即筆架

### 蛇銜

魏管輅往見安平守王基基令作卦輅曰牀上當有大

蛇銜筆大小共視須臾失之且曰蛇者書佐也

蠅集

魏書王思性急嘗執筆作書蠅集筆端驅去復來思怒取筆擲地毀之

遺以鏤管

王羲之筆經有人以綠沉漆竹管及鏤管見遺者用之多年斯可愛玩詎必金寶雕琢然後可貴乎

目為毫錐

白樂天與元微之將應制科各有織鋒細管筆以就試相顧而笑目為毫錐故贈元相詩策目穿如札毫鋒利似錐

楚聿

說文楚謂之聿吳謂之不律燕謂之弗秦謂之筆

趙毫

義之筆經諸郡獻兔毫出鴻都門唯有趙國毫中用意謂趙國平原廣澤無雜草木惟有細草是以兔肥毫長而銳須用仲秋收之孟秋去夏近毫焦而嫩季秋去冬

近毫脆而禿惟八月寒暑調乃中用

匣飾金壁

傅子云漢末一筆之匣雕以黃金飾以和璧綴以隋珠  
文以翡翠此筆非文犀之植必象齒之管豐狐之柱秋  
兔之翰用之者必被朱繡之衣踐雕玉之履矣

管用象犀

唐歐陽詢字信本潭州人其子通書亞于父號大小歐陽體通  
晚自矜重以狸毫為筆覆以兔毫管用象犀非是不書

# 點額

吳孫權嘗夢北面頓首于天帝忽見一人以手點其額權以問徵士熊循循曰大王必為主王者人之首王上加點乃主字之象也又齊高洋夢人以筆點其額王曇首賀曰王當作主  
定名

唐世舉子將入場嗜利者爭賣健毫圓鋒其價十倍號定名筆筆工每賣一枝則錄姓名俟其榮捷則詣門求阿堵俗呼謝筆就求靳與

王羲之曰余嘗自為筆甚可用謝安庾稚恭每就吾求之吾靳而不與

欲取不得

隋書故事天子臨軒掌朝典筆硯至御座則大夫取進之及劉行本為掌朝進筆于帝承御復欲取之行本抗聲謂承御曰筆不可得帝問之對曰臣聞設官分職各有司存臣既不得佩承御刀承御亦焉得取臣筆帝曰然因令二司各行所職

寫祭文

晉時北郊祭文上命王羲之更寫之工人削之羲之筆  
已入木七分宋吳淑筆賦逸少驚入木之七分仲尼止  
獲麟之一句

著國史

晉書王隱著國史始成八十八卷屬免官家居貧未能  
就遂南遊投陶侃又詣江陵投庾元規元規給筆札其  
書遂成

削荆

拾遺記任末字叔本年十四學無常師或依林木之下  
編茅為廬削荆為筆夜則映月望星暗則燃蒿自照

刊竹

晉嵇含筆賦序季秋之月毫鋒甚偉遂刊懸崖之竹而  
為筆

紀不法

魏明帝見殿中侍御史簪白筆側階而立問此何官辛



毗曰御史簪筆書過以紀陛下不依古法者今特備官  
耗筆耳

彈失儀

白樂天紫毫筆詩搦管趨入黃金闕抽毫立在白玉除  
爾知紫毫不易致每歲宣城進筆時紫毫之筆如金貴  
慎勿空將彈失儀慎勿空將錄制詞

竊讀筆說

世說王羲之曠之子早于其父枕中竊讀筆說父恐其

幼不與乃拜泣而請之

助取筆價

唐羅隱字昭諫喜筆工長鳳語之曰筆文章貨也吾當  
助子取高價即以鴈頭牋百幅為贈士大夫聞之懷金  
問價

筆象乾坤

蔡邕筆賦上剛下柔乾坤位也新故代謝四時次也圓  
和正直規矩極也玄首黃管天地色也

筆為鋤耒

語林晉蔡洪赴洛洛人問曰吳中舊姓何如荅曰吳府君聖朝之盛佐明時之俊又朱永長理物之宏德清選之高望嚴仲弼九臯之鳴鶴空谷之白駒顧彥先八音之琴瑟五色之龍章張威伯歲寒之茂松幽夜之逸光陸士龍鴻鵠之徘徊懸鼓之待槌此諸君以洪筆為鋤耒以紙札為良田以玄墨為稼穡以禮義為豐年

九分二握

王羲之筆經毛杪合鋒令長九分管修二握須員正方可

三東五重

晉成公綏棄故筆賦結三東而五重建犀角之玄管

鼠鬚

世說王羲之得筆法于白雲先生先生遺以鼠鬚筆又鍾繇張芝皆用鼠鬚

雞距

白樂天有雞距筆賦黃山谷有謝送宣城筆詩宣城變  
樣蹲雞距諸葛名家捋鼠鬚一束喜從公處得千金徧  
索市中無

麟角

晉武帝以博物志成賜張華麟角筆管遼西所獻也青  
鐵硯用于閩國所貢鐵為之也側理紙萬番南越所貢  
也按側理一名陟釐

鹿毛

王隱筆銘豈其作筆必兔之毫調利難禿亦有鹿毛

拙筆見容

齊武帝欲擅書名王僧虔不敢顯迹嘗用拙筆得以見容

假筆不許

五代史閩人黃碣有假其筆者碣曰是筆當斷大事不許假也

智永筆塚

尚書故實僧智永積年學書有秃筆頭十甕甕皆數千頭瘞之號筆塚

司馬筆囊

宋司馬文正公有貯筆黃囊及紅管筆一枝今藏在太史范氏文正親題其上實治平中賜物也淳熙六年張敬夫為之銘

棗心

朱元晦跋蔡藻筆云蔡藻造筆能書者識之此故沅州

呂使君語也因試其所製棗心樣喜其老而益精并深山陽鄰笛之感

栗尾

歸田錄蔡君謨為歐陽永叔寫集古目錄序歐以鼠鬚栗尾筆銅綠格為潤筆君謨笑以為太清而不俗

筆授少瑜

見文章

筆賜時可



宋百家詩錢次公以墨四九筆五枝賜楊時可楊戲曰  
安得硯乎次公曰不難須一詩耳楊乃作一絕云尖頭  
奴有五兄弟十八公生四客卿過我書齋無一事似應  
終日待陶泓

### 筆陣

王羲之筆陣圖夫紙者陣也筆者刀稍也墨者鍔甲也  
水硯者城池也心意者將軍也本領者副將也結構者  
謀畧也出入者號令也屈折者殺戮也

筆耕

張著翰林盛事王勃能文請者甚衆金帛盈積人謂心  
織而衣筆耕而食

驚四座

杜詩落筆驚四座

掃千軍

杜詩詞源倒流三峽水筆陣獨掃千人軍

插架落紙

蘇叔黨鼠鬚筆詩插架刀稍健落紙龍蛇驚穿墉何卑  
微托此得佳譽

粘粉帶香

僧貫休詩粘粉為題棲鳳竹帶香因洗落花泉

墨

釋名墨者晦也言似物晦默也

黑松使者

陶家瓶餘事唐玄宗一日見御案墨上有小道士如蠅而行上叱

之即呼萬歲曰臣墨之精黑松使者也凡世人有文者其墨  
上皆有龍賓十二上神之因賜名龍香劑以墨分賜掌文官  
玄香太守

纂異記唐薛稷封墨為公加九錫拜玄香太守兼亳州楮  
郡平章事是日墨吐異氣結成樓臺狀鄰里來觀良久乃  
滅又韓退之毛穎傳毛穎與絳人陳玄弘農陶泓會稽楮  
先生友善文嵩有易玄光傳玄光字處晦燕人也其先號  
青松子玄光與南越石虛中為研究雲水之交與宣城毛

元銳為文章濡染之友天子重儒封玄光為松滋侯

畫掌記文

張儀蘇秦二人同志並剪髮以相活或傭力寫書行遇  
聖人之文無筆可記則以墨畫於掌內及股裏夜還更  
折竹寫之

出汁寫書

拾遺記昔老君居景室山與老叟五人共談天地之數  
撰經書垂千萬言有溪提國二神人出金壺中有墨汁

狀若淳漆以寫之及金壺汁盡二人剗心瀝血以代墨  
焉又宋雲行記西天摩伏生斲髓為墨寫大乘經按五  
老即五天之釋也景室大室小室也

觀書石室

西京雜記詔令尚書賜揚雄筆墨觀書石室

譯經淨堂

文房四譜晉義熙中三藏佛馱陀住建業謝司空寺造  
護淨堂譯華嚴經堂下忽化出一池常有青衣童子自

池中出與僧灑掃研墨也

月給二枚

西京雜記漢尚書令僕丞郎月給隄廩墨大小二枚

日給五斛

大業拾遺記隋煬帝宮女爭畫長眉司宮吏日給螺子黛五斛號蛾綠子又北戶錄梁朝以墨為螺為量為丸為枚

給太子

東宮故事皇太子初拜給香墨四丸

賜近臣

澠水燕談蔡君謨云李超本易水人唐末與其子廷珪  
亡至歙州以其地多松留居焉其造墨堅如玉紋如犀  
遂以墨名家本姓奚江南賜姓李其墨有劒脊圓餅面  
多為龍紋嘉祐中仁宗宴近臣于羣玉殿嘗以墨賜之  
曰新安香墨其後翰林承旨受賜者有雙脊龍樣尤為  
佳品



王遠題門

漢王遠字方平明天文圖讖桓帝徵之間以災祥遠乃  
題宮門四百餘字帝惡而令人削之外字去內字復見  
墨皆入木裏

荀濟磨楯

潁川荀濟與梁武帝徵時有舊而帝素輕之及帝受禪  
于是濟乃入北甯云曾于楯鼻上磨墨作文擲

汚陵垣

東漢光武起兵王莽令以墨汚渭陵延陵周垣按渭延  
二陵元成二帝陵也

漆寺門

邵氏後錄宋太祖下南唐得李廷珪父子墨同俘獲付  
主藏吏籍收不以為貴也後有司更造相國寺門詔用  
墨漆取墨於主藏車載以給皆廷珪父子墨至宣和間  
黃金可得而李墨不可得矣

吐於魚腹

陶隱居本草注烏賊魚腹中有墨今作墨用之又草木  
子曰烏賊魚墨汁為書如淡墨有為偽券以誑人者當  
知之經年墨消

養以豹囊

四譜養墨以豹皮囊貴乎遠濕

上黨松心

四譜上黨松心為墨尤佳

隄廩松節

段成式送溫飛卿書隄廩松節絕已多時

用墨祝婚

陸士龍與兄書古有九子之墨祝婚者取多子之義祝  
曰九子之墨成於松烟本姓長生子孫無邊段成式送  
溫飛卿墨書名殊九子狀異二螺

欠墨焚券

志林賣墨者潘谷予不識其人然聞其所為非市井人  
也墨既精妙而價不二士或有持錢求墨不計多少與

之一日忽取欠墨錢券焚之飲酒三日發狂浪走遂赴井死人下視之蓋跪坐井中手尚持數珠也坡翁嘗贈以詩

徐峯傳術

龍髓記徐峯善棋段成式欲盡窮其術峯曰子若以墨狻猊與我當傳子使子過我十倍

祖氏聞名

四譜祖氏本陽定人唐之墨官也世以易水墨為上祖

氏之名聞天下也

士龍送兄

晉陸士龍與兄士衡書曰一日上三臺得曹公所藏石  
墨數十萬片云燒毀復可用不知兄頗見之否今送二  
螺

陶侃獻帝

晉陶侃獻帝牋紙三千枚墨二十九皆極精妙

懷化塹

顧微廣州記懷化掘塹得石墨甚多精好可寫書

筑陽山

盛弘之荊州記筑陽縣有墨山山石悉如墨

一點如漆

蕭子良答王僧虔書子邑之紙研妙輝光仲將之墨一點如漆

一噴成字

神仙傳班孟能嚼墨一噴皆成字竟紙皆有意義

徐鉉墨價

清異錄徐鉉兄弟工染翰崇飾書具嘗出一月團墨曰  
此價值三萬

冀公墨法

冀公墨法用松烟二兩丁香麝香乾漆各少許以膠水  
摻作挺置火上薰之一月可使也入紫草末色紫入秦  
皮末色青

不許人磨



東坡墨說阮生云未知一生當著幾兩屐吾有佳墨七十枚而猶取不已不近愚耶石昌言蓄李廷珪墨不許人磨或戲之曰子不磨墨墨將磨子今昌言墓木拱矣墨固無恙可為好事者之戒

皆出自造

宋書張永善隸書又有巧思紙及墨皆自營造上每得永表啟輒把玩咨嗟自嘆供御者所不及

青松烟

魏曹植樂府墨出青松烟筆出狡兔翰

烏玉玦

蘇東坡謝孫莘老寄墨詩我貧如饑鼠長夜空齧齧瓦  
池研竈煤葦管書柿葉近者唐夫子遠致烏玉玦先生  
又繼之圭璧爛箱匣晴牕洗硯坐蛇蚓稍蟠結便有好  
事人敲門求醉帖

山谷錦囊

邵氏後錄黃山谷于几間取小錦囊有墨半丸以示賣

墨者潘谷谷隔囊手之置几上曰天下之寶也出之乃  
李廷珪墨又別取小錦囊有墨一丸示之谷手之如前  
則嘆曰今老矣不能為之乃谷少時所作墨也其藝之  
精如此

淵材布索

宋彭淵材元豐間人喜遊嘗負一布索曰吾無可將因  
開索惟有李廷珪墨一丸文與可畫竹一枝歐陽公五  
代史而已

光如目睛

志林世人論墨多貴其黑而不取其光光而不黑固為棄物若黑而不光索然無神采亦復無用要使其光清而不浮湛湛如小兒目睛乃為佳也懷民遺僕二枚其陽云清烟煤法墨其陰云道卿既黑而光如前所云者書以報之

質如金玉

宋陳無已古墨行序陳履常云晁無斁有李墨半丸云

裕陵故物也往于秦少游家見李墨不為文理質如金  
亦裕陵所賜王平甫家所藏者潘谷見之再拜曰真李  
廷珪所作也世惟王四學有之與今為二矣嗚呼世不  
乏奇之識者耳敬為平甫并無數同作古墨行

夢墨盈袖

見文章

懸墨滿堂

志林李公擇見墨輒奪相知間抄取殆遍近有人從渠

許來云懸墨滿堂此亦通人之一蔽也余嘗有詩曰非人磨墨墨磨人此語殆可淒然云

妙一世

宋洪駒父與墨工詩子墨客卿妙一世懷玉山人五丈夫峨嵋老仙與推轂谷量牛馬斗量珠

給上方

東坡詩溪石琢馬肝剗藤開玉板噓噓雲靄出奕奕龍蛇綰此中有何好秀色紛滿眼故人歸天祿古漆窺靈

簡隄麋給上方老手擅編剡分餘幸見及流落一枝報  
輕煤餘馥

宋歐陽季默以油烟墨二丸餉東坡東坡詩云書牕拾  
輕煤佛帳拂餘馥辛勤破午夜收此長寸玉

珍材妙手

東坡謝孫莘老寄墨詩徂徠無老松易水無良工珍材  
取樂浪妙手惟潘翁魚胞熟萬杵犀角蟠雙龍墨成不  
敢用進入蓬萊宮蓬萊春晝永玉殿明房櫳金牋灑飛

白瑞霧縈長虹遙憐醉常侍一笑開天容

景煥墨材

清異錄蜀人景煥博雅士也志尚高隱卜築玉壘山茅  
堂花榭足以自娛嘗得墨材甚精止造五十九曰以此  
終身墨印文曰香壁陰篆曰副墨子

熙載墨文

清異錄韓熙載留心翰墨四方膠煤多不合意延歛匠  
朱逢于書館傍燒煤供用命其所曰化松堂墨文曰玄



中子又自名麝香月匣而寶之熙載死妓妾携去了無存者

紙

釋名紙砥也謂平滑如砥石也春秋序在古無紙大事書之于策小事簡牘而已北戶錄漢官儀以紙為番為幅為枚

蔡侯

自古書契多編以竹簡其用縑帛者謂之紙然縑貴而

簡重竝不便于人東漢蔡倫字敬仲桂陽人乃造意用樹膚麻頭曰麻紙及敝布魚網曰網紙木皮曰穀紙奏上之和帝善其能自是莫不用焉天下咸稱蔡侯紙

左伯

書斷左伯能為紙時蔡倫亦為之而左伯尤為精妙鄴都宮觀成詔韋誕仲將題署誕奏曰若用張芝筆左伯紙及臣墨兼此三具又得臣手然後可以成徑丈之勢

楮國公

纂異記薛稷為紙封九錫拜楮國公白州刺史統領萬  
字軍略道中郎將事韓退之毛穎傳穎與會稽楮先生  
友善其出處必偕

好時候

好時候傳謂紙為華陰楮知白字守玄亦曰好時候文  
館書史

紙賜張華

晉張華博物志成帝賜側理紙萬張南越所獻也南人

以海苔為紙其理縱橫倒側因以為名王子年曰本陟  
釐紙也漢人語訛故謂之側理耳

紙授李生

異聞集霍小玉取朱絲繡囊出越姬烏絲欄素緞三尺  
以授李生生多才思援筆成章按宋毫間紙有織成界  
道者謂之烏絲欄李生一作王生

書送傅能

漢書趙婕妤好妬後宮傅能生子詔封綠小篋中有藥二

枚赫嘯書曰告傅能努力飲藥注云赫嘯薄小紙也

書與曹宮

趙飛燕傳漢成帝以篋裏藥餌用赫嘯書與獄中婦人曹宮飲注云曹宮宮婢有皇子者

詔賜干寶

晉干寶表曰臣前聊欲撰記古今怪異非常之事乏紙筆或書故紙于是詔賜紙二百枚

悉送謝公

語林王右軍為會稽謝公就求牋紙庫中有九萬張悉與之桓宣武云逸少不節

鳳銜

鄴中記石虎詔書以五色紙著鳳銜口中

鵲墜

因話錄大中中孔溫裕因直諫貶郴州有雀喜于庭兒孫拜之飛去墜下方寸紙上有補闕字未幾徵還果有此拜

當策

晉傅咸紙賦既作契以代繩又造紙以當策庶方有體  
柔性全真

寫經

杜陽編德宗時有朱鳥來常噉玉屑聲甚清暢及為鷲  
鳥所搏宮人皆以金花紙寫心經薦其冥福

桃花

晉桓玄偽事詔令平淮作桃花箋有縹綠青赤等色又

唐楊炎在中書後閣用桃花紙糊窓塗以冰油取其甚明

桑根

四譜雷孔璋曾孫穆之者家猶存張華與其祖書所書乃桑根紙也

布頭

志林取布頭機餘經不受緯者治之作紙名布頭箋此紙名冠天下



麻面

國史補紙之妙者則越之剡藤苔牋蜀之麻面薛骨金花魚子十色牋也唐舒元興有悲剡溪古藤文蓋剡溪藤可作紙言今之錯為文者皆天關剡溪藤之流也

藤角

詩話范甯教曰土紙不可以作文書皆令用藤角紙

麥光

東坡詩麥光鋪几淨無瑕麥光紙名

鴈頭

見筆

鳳尾

古有鳳尾牋畚薄縷輕制作精妙

縹紅

東宮舊事皇太子初拜給赤紙縹紅紙各一百枚

硬黃

秘閣所藏二王書多唐人所臨紙皆硬黃故東坡詩硬

黃小字臨黃庭

樹葉

林邑記九真俗以樹葉為紙

松紋

清異錄先君畜白樂天墨跡兩幅背之右角有方長小黃印文曰剡溪小等月面松紋紙臣彥古等上

洪兒紙

童子神通錄姜澄年十歲其父善書苦無紙澄乃燒糠

賢竹為紙以供父澄小字洪兒鄉人號洪兒紙

薛濤牋

唐元和初蜀妓薛濤造松花牋濤好製小詩惜其幅大不欲長賸乃狹小之人以為便蜀才子後減諸牋亦如是特號薛濤牋又資暇錄松花牋其來舊矣世以為薛濤牋非也

銀光

丹陽記江寧縣有紙官署齊高帝造紙所也嘗造凝光

紙賜王僧虔一云銀光

玉版

宋陳師道詩南朝官紙兒女膚玉版雲英比不如乞與  
此公原不稱他年留與大蘇書又楊誠齋送東紙詩檢  
點文房有宿儲楮先生輩亦中書小生才寡元無用大  
阮才高正要渠

浮碧殷紅

唐楊巨源酬崔駙馬惠牋詩浮碧定從天上得殷紅應

自日邊來捧持價重欺雲葉封裏香深笑海苔

鴉青鵲白

黃山谷為范子默求染鴉青紙詩學似貧家老破除古  
今迷忘失三餘極知鵲白非新得謾染鴉青襲舊書又  
云滑如女髮蘭膏罷明似山光夜月餘為染溪藤三百  
箇待渠湔拂一牀書

琅玕十幅

雜俎東都龍門有一家相傳廣成子所居也天寶中推

禪師居于此庭有古桐桐華時有異蜂聲如人吟禪師  
諦視之具體人也乃捲竹幕巾網而獲焉置于紗籠中  
嗜食桐花其傍忽有數蜂翔集隔籠相慰勉一曰予與  
青童君奕勝獲琅玕紙十幅君出當為我寫星子詞其  
語皆非世人事僧乃舉籠放之

繡花百番

唐蕭穎士少夢人授紙百番開視皆繡花也

妍妙輝光

邵氏後錄唐人有生紙熟紙熟紙妍妙輝光生紙非有喪不用故韓退之書與陳素曰嘗送孟郊序用生紙寫書急于自解不暇擇耳

虛柔滑淨

墨藪紙取東陽魚卵虛柔滑淨

羲之作序

世說王羲之書蘭亭序用蠶繭紙鼠鬚筆適媚勁健絕代所無



蕭貫賦歌

宋蕭貫少時夢至一宮殿見羣女如神仙一人授紙曰  
此行波牋也煩賦宮中曉寒歌貫援筆立成云十二堯  
闕隱宮綠獸猊呀酒椒壁馥渴烏涓涓不相續轆轤欲  
轉飛紅玉百刺香殘隕蓮燭五龍吐水漫寒漿紅銷佩  
魚無左璫兩兩懸足瞻扶桑紅萍半規出波面回首觚  
稜九霞綯鳴鞘遠從天上來大劒高冠滿前殿仙曰子  
詩甚有奇語異日必貴至祥符中試天下如置器賦蔡

齊榜登第

分送庭筠

唐段成式送溫庭筠雲藍紙絕句并序予在九江造雲  
藍紙既乏左伯之法全無張永之功輒分送五十枚其  
詩云三十六鱗充使時數番猶得寄相思待將袍襖重  
抄了寫盡襄陽播摺詩又四譜溫飛卿集中有掘拓詞  
恐播摺字誤

贐送杜暹

見餽遺

魏國一丞

魏武帝令曰今諸掾屬治中別駕常於月朝各進得失  
可給紙各一丞

雲陽六合

國史補雲陽有六合牋

硯

釋名硯研也研墨使和濡也或曰洗硯不得用熱湯

但用故紙蓮房拈灰洗為佳

治玉

四譜黃帝得一玉組治為墨海其上篆文曰帝鴻氏之  
硯

鍛金

晉傅玄硯賦採陰山之潛璞問衆材之攸宜即方員以  
定形鍛金鐵以為池

馬肝

漢武帝時鄧支進馬肝石以和丹砂食之則彌年不饑  
以拭白髮盡黑此石亦可作硯有光起

### 龍尾

歐陽永叔曰歙石出龍尾溪以金星者為貴龍尾硯在  
端溪上而端溪以後出見貴耳東坡贈龍尾硯詩君看  
龍尾豈石材玉德金聲寓於石

### 魏臺

四譜魏銅雀臺遺趾人多發其古瓦琢硯甚工貯水數

日不燥世傳昔人製此臺其瓦俾陶人澄泥以締絡濾過加胡桃油埏埴之故與他瓦異

柳壁

柳宗元柳州山水記壁曰龍壁其下多秀石可為硯

紅絲

青州有紅絲石紅黃相叅理黃者其絲紅理紅者其絲黃

青鐵

張華博物志成賜以青鐵硯用于開國貢鐵為之也

元賓誤毀

韓愈瘞硯銘隴西李元賓行于褒谷之間誤毀其硯匣  
歸京師愈讚而識之土乎成質陶乎成器器復其質非  
生死類全斯用毀不忍棄埋而識之仁之義硯乎硯乎  
與瓦礫異

盧攜相投

見同僚

封九錫

薛稷為硯封九錫拜石鄉侯鐵面尚書使持節即墨軍事文嵩石虛中傳虛中字居默器宇方圓中心坦然拜即墨侯宋洪駒父有陶泓傳

名三灾

清異錄唐蕭穎士文爽兼人而矜躁為甚嘗至倉曹李韶家見歛硯頗良既退語同行者君識此硯乎蓋三灾石也同行不喻而問之答曰字札不奇硯一灾文詞不



優硯二穴牕几狼籍硯三穴同行者歛眉領之

贈庾翼

晉庾翼少為侍中袁彖所重贈以鹿角書格蟀硯象牙  
筆管

遺洪涯

洪涯先生欲歸河內舍人劉守璋與道士吳恪儒生張  
隱來謁贈先生揚雄鐵硯并四皓鹿角枕

蓮葉

繁欽硯贊或規如馬蹄或銳如蓮葉

竹節

四譜西域無紙筆有墨以瓦合或竹節即其硯也

范馨與孫

見祖父

蒯鰲許友

蒯鰲畜龍尾硯友人欲之而不言鰲心許之友人不告而去乃徒步追及送之

七寶鑪

開元遺事內庫中有七寶硯鑪一所曲盡其巧每冬寒硯凍置於鑪上不勞置火硯冰自消

四鑲鼓

清異錄宣城裁衣肆用一石鎮色紫而潤予以為堪為硯材買之琢為四鑲鼓硯綴以白玉環方圓逾一尺

漢陽碧玉

許漢陽以白玉為筆管以碧玉為硯玻璃為硯匣

興平青石

劉澄之江州記興平縣蔡子池南有石穴深二百丈許  
石色青堪為書硯

雷電光

杜子美石硯詩巨璞禹鑿餘異狀君獨見其滑乃波濤  
其光或雷電

鸚鵡眼

蘇易簡硯譜柳公權論硯以青州石為第一絳州者次

之殊不言端溪或曰端溪水中石其色青山半石其色  
紫山頂石尤為光潤如猪肝色者佳其貯水處有白赤  
黃色點者謂之鸚鵡眼脉理黃者謂之金線文其山號  
斧柯昔人採石為硯必以中牢祭之不爾雷電失石所  
在

### 汾水泥

四譜絳縣人善製澄泥硯縫絹囊盛泥置汾水中踰年  
而後取則泥已實囊矣陶為硯水自不涸

黠灘石

宋葉少蘊曰東坡作鳳味石硯云出北苑鳳城山余至  
建州求之無有蓋南劍黠淡灘石也此石有二種其一  
出鹵水去黠淡四十里細潤而不甚發墨黠淡灘石宜  
墨而膚理不逮又胡仔云黠淡灘石有一種黑眉黃眼  
人以為硯東坡鳳味必此灘石也

活眼死眼

東坡筆錄端石所出巖石為甲石屋次之西坑又次之

然巖石又分上下有活眼淚眼死眼之別圓暈相重黃黑相間鱗睛在內晶瑩可愛謂之活眼四旁浸漬不甚瑩明謂之淚眼形體畧具內外皆白謂之死眼活勝淚淚勝死死勝無

德人俊人

邵氏後錄端石如德人每過于厚或廉于才不能砥滯歛石如俊人輒傾倒失之輕而遇事風生元不一一厭足人意

斗形

唐彦猷曰端石有上下巖西坑後磨惟上巖有眼眼之美者青黃三色相重多者自外至心凡九重其大者尤為希有或布硯中為北斗心房之形其生於墨池之外者謂之高眼生于內者謂之低眼

風字

會稽有老叟云王右軍之後持一風字硯大尺餘色正赤用之不減端石楊休以錢二萬買之



得之比丘

清異錄和魯公有白方硯通明無纖翳得之於峨嵋比  
丘公自題硯室曰雪方池

訪于諸阮

唐李文資暇集元和初叔祖宰虢之朱陽諸阮溫清之  
隙必訪山水一日于澗側得一石時携鐫具以往因刻  
其遊山之姓氏年月覺其石美遂琢為硯名曰稠桑石  
硯

類月

蘇子美集江上有石形色類月取以為硯子美詩我疑  
此山石久為月照著老蚌吸月月降胎水犀望星星入  
角彤霞爍石變丹砂白虹貫巖生美璞

涵星

東坡以月石硯贈范子功以涵星硯贈范純父

贈李白

李白酬殷十一贈栗岡硯詩殷侯三玄士贈我栗岡硯

灑染中山毫光輝吳門練天寒水不凍日用心不倦携此臨墨池還如對君面

遺梁燾

宋蘇頌守杭梁燾以京朝官通判明州道出錢唐公一見異之臨別以一硯遺之曰石硯一枚留為他日玉堂之用梁公謝而留之後頌拜相燾在翰林草制乃其硯也

包拯不持

見太守

孫甫不受

宋孫甫字之翰有人送一硯直錢三十千孫曰硯有何異如此之貴客曰硯以石潤為賢此石呵之則水流孫曰一日呵得一石水纔直三錢得此何用遂不受

易以銅劍

宋張仲幾有龍尾紫石硯東坡以銅劍易之

綴以玉環

見前四環鼓注

地象天光

繁欽硯贊方如地象圓似天光

體鈍用靜

宋唐庚家藏古硯銘并序硯與筆墨蓋氣味相類也出入相近也任用寵遇相近也獨壽夭不相近也筆之壽以日計墨之壽以月計硯之壽以世計其故何也其為體也筆最銳墨次之硯鈍者也豈非鈍者壽而銳者夭

乎其為用也筆最動墨次之硯靜者也豈非靜者壽而動者夭乎吾于是而得養生焉以鈍為體以靜為用或曰壽夭數也非鈍銳靜動所制借令筆不銳不動吾知其不能與硯久遠也雖然寧為此勿為彼也銘曰不能銳因以鈍為體不能動因以靜為用惟其然是以能永年

作春秋

宋胡旦字周父有俊才尚氣節有一硯鏡其旁曰宋朝

胡旦作春秋硯

置符幟

異苑新道支于水側得一浮櫬取為硯製形象魚道支  
有道家符幟皆置魚硯中忽失之夢人曰吾暫遊湘水  
為二妃所留可于水際見尋也道支旦至水側畱者得  
一鯉魚買剖之得先時符幟方悟忽又失之有人過湘  
君廟見魚硯在二妃側也

與硯結鄰

唐李德裕有一硯名結隣言與硯結為隣也

好硯成癖

清異錄南昌陳省躬好硯成癖晚得一枚腹有四眼徐  
鉉名之曰方相石省躬以近凶不用自號為仙翁硯蓋  
取道家四目老翁之說

汪少微硯銘

茗溪詩話東坡云余家有歛硯底有歛識云吳順義元  
年處士汪少微銘松操凝煙楮英鋪雪毫穎如飛人間



四絕

蘇東坡硯歌

東坡眉子石硯歌君不見李成畫手開十眉橫雲卻月  
爭新奇遊人指點小頻處中有漁陽胡馬嘶又不見王  
孫青瑣橫牕碧腸斷浮雲遠山色書生性命何足論坐  
費千金買消渴邇來喪亂愁天公謫向君家書硯中小  
牕書幌相嫵媚令君曉夢生春紅

底承魚口

清異錄余家世寶一硯形正圓腹作兩池底分三魚口以承之紫潤可愛背陰有字云璧友

紋似龍鱗

清異錄開元二年賜宰相張文蔚楊涉薛貽實相枝各二十龍鱗月硯各一實相枝斑竹筆管也花點勻密如瓦毫龍鱗硯石紋似之月者硯形象之蓋歛產也

山堂肆考卷一百七十七

欽定四庫全書

山堂肆考卷一百七十八

明

彭大翼

撰

器用

弓

器物總論弓之為言穹也張之穹穹然也其末曰簫  
又謂之弭中央曰弣簫弣之間曰淵其弦所居處曰  
彊木弓曰弧有臂弓曰弩弓衣曰鞬一曰橐一曰弣  
一曰鞬鞬弓藥曰秘爾雅有緣者謂之弓無緣者謂

之弭以金者謂之銑以蜃者謂之珽以玉者謂之圭  
世本黃帝之臣揮始作弓牟夷作矢山海經少昊生  
般始為弓矢孫卿曰垂作弓墨子曰羿作弓

黃帝墮弓

史記黃帝騎龍上天小臣不得上悉持龍髯髯拔墮黃  
帝之弓百姓望黃帝抱其弓而號後世因名其弓曰烏  
號又古考烏號者柘木枝長而烏喜集將飛枝彈烏烏  
乃號呼人因取柘為弓因名烏號

楚共亡弓

家語楚共王出遊亡其烏號之弓左右請求之王曰止也楚人失弓楚人得之又何求焉孔子聞之曰惜乎其不大也宜曰人遺弓人得之而已何必楚也

問卻

左成十六年晉楚戰於鄢陵卻至三遇楚子之卒見楚子必下免胄而趨風楚子使工尹襄問之以弓注云問遺也共王使工尹遺至以弓以答其意

招虞

左昭二十年齊景田於沛招虞人以弓不進公使執之  
辭曰昔我先君之田也旃以招大夫弓以招士皮冠以  
招虞人臣不見皮冠故不敢進乃舍之

錫諸侯

詩小雅彤弓召兮受言藏之我有嘉賓中心貺之鐘鼓  
既設一朝饗之此天子燕有功諸侯而錫以弓矢之樂  
歌也

賜六軍

見銘

在東房

周書和之弓在東房注云和古之弓人也

倚西序

禮儀司射告賓曰弓矢既具有司請射賓與大夫弓倚於西序矢在弓下

象弭

詩小雅四牡翼翼象弭魚服注云象弭以象骨飾弓弣也魚獸名似猪其皮背上斑文腹下純青可為弓韃矢服也

麟膠

楊師道奉和詠弓詩霜重麟膠勁風高月影圓鳥飛隨帝輦鴈落遂鳴弦

射神

周禮秋官庭氏掌射國之夭鳥若不見其鳥獸則以救



日之弓與救月之矢夜射之若神也則以太陰之弓與  
枉矢射之注云鳥獸為妖者夜中聞聲而不見其物則  
以日食日所造弓月食日所造矢射之以陰陽至盛之  
氣攻暗昧不明之妖則息矣太陰之弓救月之弓也枉  
矢救日之矢也

備盜

天文要集弧者備盜賊也

好以大屈

左昭七年楚子享魯昭公於新臺使長鬣者相好以大  
屈旣而悔之遽啓疆聞之見公公語之拜賀曰齊與晉  
越欲此久矣寡君無適與也而傳諸君君其備禦三鄰  
慎守寶矣敢不賀乎公懼乃反之注云大屈弓名

分以繁弱

左定四年衛侯使祝佗私於萇弘曰周公相王室以尹  
天下於周為睦分魯公以大路大旂夏后氏之璜封父  
之繁弱注云封父古諸侯也繁弱大弓名

# 奪弱

左定八年公侵齊門於陽州士皆坐列曰顏高之弓六鈞皆取而傳觀之陽州人出顏高奪人弱弓籍丘子鉏擊之與一人俱斃

## 用彊

呂氏春秋齊宣王好射悅人之謂已能用彊弓也其所常用弓不過三石以示左右左右引之及半而止皆曰不下九石非王不能用是宣王所用不過三石而終身

自以為九石豈不悲哉

楚桃

左昭十二年楚靈王曰我先王熊繹僻在荊山箬路藍  
縷以處草莽跋涉山林以事天子唯是桃弧棘矢以供  
禦王事

越棘

沈懷遠南越志宋昌縣有棘竹長千尋里人取之以為  
弓陳琳武庫賦弓則烏號越棘繁弱角端

取幹

周禮取幹之道以柘為上櫪次之檟桑次之橘次之木  
次之荆次之竹為下又曰凡相幹欲赤黑而陽聲赤  
黑則向心陽聲則遠根

成規

周禮冬官司弓矢掌六弓四弩八矢之法辨其物名而  
掌其守藏與其出入天子之弓合九而成規諸侯合七  
而成規大夫合五而成規士合三而成規句者謂之弊

弓注云矩主義規主仁於其弓弛而未張則合以取圓  
合多而成規者其弓剛合少而成規者其弓柔乾剛君  
道也天子不當勢屈故其體強坤柔臣道也諸侯不得  
不屈故其體俛大夫與士其勢轉卑則倍而俛宜也

九和

周禮凡為弓材美工巧及為之時謂之三鈞角不勝幹  
幹不勝筋謂之三鈞量其力又三鈞鈞者三謂之九和  
按又三鈞者謂如幹勝一石加角而勝二石被筋而勝

三石也

六材

總論弓之用材也六曰幹曰角曰筋曰膠曰絲曰漆幹之本強所及必遠角之勢順所發必疾筋之力銳所中必深合之以膠則和纏之以絲則固環之以漆則受霜雪而不為之損六材既美而又天時工巧之不相違此弓之所以為良也

以弓請兵

劉向說苑齊攻魯子貢見哀公請救於吳公曰奚先君  
寶之用子貢曰使吾用寶而與我師是不可恃也於是  
以楊幹麻筋之弓六往

因弓悟治

唐太宗謂蕭瑀曰朕少好弓矢得弓十數自謂無以加  
近以示弓工乃曰非良材朕問其故工曰木心不正脉  
理皆邪弓雖勁而發矢不直始悟向者辯之未精也弓  
猶失之況於治乎



# 荆筋

列女傳晉平公使工人為弓三年乃成射不穿一札公怒將殺工其妻見公曰妾之夫造此弓亦勞矣幹生秦山之阿一日三覩陰三覩陽傳以燕牛之角纏以荆蘄之筋糊以河魚之膠此四者天下之選也不穿一札是君不能射也而反欲殺妾之夫不亦謬乎妾聞射之道左手如拒右手如附枝右手發之左手不知此射之道也公以其言為儀而穿七札弓工乃得出賜金三鎰注

云札鎧札也燕角美荆筋細河魚膠粘

燕角

見習射

擊奄水

見誕子

挂扶桑

荆楚故事襄王與唐勒景差宋玉等遊雲夢之臺王謂左右曰能大言乎唐勒曰壯士怒兮絕天柱北斗戾兮

泰山夷宋玉曰方地為輿圓天為蓋彎弓挂扶桑長劍倚天外

却突厥

褚從龍作唐武庫大弓銘其序云唐武庫嘗藏天策大弓長矢而世寶之每郊丘重禮陳於儀物之首詩人得以流傳詠歌之方王之逐黑闥而寢於突厥也嘗以此射卻之然王豈徒以弓矢長大威虜哉觀其心正脉邪之辯殆有得於攻心之法故能製弧矢而倍於常而射之

神且速史臣書其事於黑闥傳謂突厥得箭傳以為神  
箭豈神哉射之神也遂追述而銘之

敗契丹

宋吳璘製強弓勁弩足以敗契丹一說璘製神臂弓

二弓交韞

詩秦風虎韞鏤膺交韞二弓交韞者交二弓於韞中謂  
顛倒安置之必二弓者以備壞也

四弓疊挽

三國典畧齊綦連有勇力梁使來聘求欲相角連帶兩韃  
左右馳射併取四弓疊而挽之梁人嗟服

神名推亡

春秋佑助期天弓主弓弩之張神名推亡

神名曲張

太公兵法弓神名曲張

弩

古史考黃帝作弩周禮司弓矢掌六弓四弩八矢之

法辯其名物掌其守藏與其出入

萬弩俱發

見將帥

千弩俱發

漢李陵至浚稽山與匈奴相值騎可三萬圍陵軍軍居  
兩山間以大車為營陵引士出營外為陣前行持戟盾  
後行持弓弩令曰聞鼓聲而縱聞金聲而止虜見漢軍  
少直前就營陵千弩俱發應弦而倒虜還走

平原迎信陵

趙平原君負弩先驅迎信陵君

李廣射匈奴

漢李廣以大黃參連弩射匈奴

禁民挾弩

漢公孫弘奏禁民不得挾弓弩上下其議吾丘壽王對  
曰盜賊未除郡國二千石之罪非挾弓弩之過也

請人置弩

唐李德裕請弩人於浙西由是蜀之器械皆犀利

射䟽及遠

漢晁錯曰勁弓強弩射䟽及遠則匈奴之弓弗能格也

破駢陷陣

通典爭水奪水守隘塞口破駢陷陣非弩不尅

千鈞

荀彧曰千鈞之弩不為鼯鼠發機

七制



唐六典武庫令弩之制有七一曰擘張二曰角弓三曰木單四曰大木單五曰竹竿六曰大竹竿七曰伏遠

八檐

六帖古弩有黃連百竹八檐雙弓之號

百券

朱泚自將逼奉天以百券弩射城中不及幄坐者三步拒曹操

曹操大出濡須孫權以呂蒙為督據前所立塢置強弩

萬張於其上以拒曹公因攻破之

破梵志

隋劉方經畧林邑王梵志遣兵守險乘巨象四面而至方以弩射象象中瘡却蹂其陣因攻破之

矢

釋名矢指也言其有所指向迅疾也又謂之箭箭前進也方言自關而東謂之矢江淮之間謂之鏃關西曰箭世本曰牟夷作矢孫卿子曰浮游作矢

赤莖

太公六韜陷堅陣敗強敵大黃參連弓飛鳧電景矢自  
副注云飛鳧赤莖白尾以銅為首電景青莖赤羽以銅  
為首飛鳧電景皆矢名

青鏃

魏志挹婁在夫餘東北千餘里弓長四尺如弩弓長八  
寸青石為鏃

貫肘

左成二年晉師及齊師戰於鞏郤克傷於矢流血及屨  
未絕鼓音曰余病矣張侯曰自始合而矢貫余手及肘  
余折以御左輪朱殷豈敢言病吾子忍之

中目

見月

發款

韓子曰智伯將伐趙趙襄子召張孟談問之曰奈無箭  
何孟談曰董安于之治晉陽也公宮之垣皆以款蒿櫨

楚廬之發而用之有餘箭矣君曰奈無金何孟談曰董  
安于之治晉陽也公宮令舍之堂皆鍊銅為柱質發而  
用之有餘金矣

飲羽

劉向新序楚熊渠子夜行見寢石似伏獸射之飲羽

朔蓬藪

見習射

勾越藪

亢倉子曰勾越之斲鏃以精金鷲隼為之羽以之掎筮  
則其與槁朴也無異及夫盪冠爭衡覲武決勝加之駭  
弩之上則三百步之外不立敵矣

會稽竹

爾雅東南之美者有會稽之竹箭焉東漢虞翻州舉茂  
材與孔融書并示以所著易註融答曰聞延陵之理樂  
觀吾子之治易乃知東南之美者非徒以會稽之竹箭  
也

淇園竹

東漢書上拜寇恂河內太守移書屬縣講兵肄射伐淇園之竹為矢百餘萬

姁胡筈

周禮姁胡之筈注云姁胡胡子之國在楚旁筈矢幹也  
杜子春曰筈讀為藁謂藁箭也

肅慎楛

六帖肅慎國以楛木為矢以石為鏃

遶樹

列子曰飛衛學射於甘蠅諸法並善唯嚙法不教衛密持矢以射蠅蠅嚙得鏃矢還射飛衛遶樹而走矢亦遶樹走

穿柳

見習射

魯莊僕姑

左莊十一年公以金僕姑射南宮長萬金僕姑矢名



鴻超綦衡

列子曰逢蒙之弟子曰鴻超怒其妻而怖之引烏號之弓綦衡之箭射其目注眸子而眶不眦矢墜地而塵不揚

伯棼竊二

左宣四年楚子與若敖氏戰於臯澣伯棼射王汰輶以貫笠轂師懼還王使巡師曰吾先君文王克息獲三矢焉伯棼竊其二盡於是矣鼓而進之遂滅若敖氏

仁貴發三

見將帥

來歙斲木

漢書來歙擊隗囂守洛陽發屋斲木以為箭

郎基剪紙

北齊書郎基字世業嘗征西為賊所圍糧糗皆盡乃削木為箭剪紙為羽得解圍還朝僕射楊愔勞之曰卿本文吏遂有武畧木箭紙羽皆無故事班墨之思何以過

之

羊頭

揚雄方言凡箭鏃三者謂之羊頭

鷓尾

魏百官志三公拜賜鷓尾鷓尾箭十二枚

飲石梁

闕子曰宋景公使弓人為弓三年而成獻之曰臣之精盡於弓矢獻弓而歸三日乃死公張弓登虎圈之臺東

面而射矢踰西霜之山集彭城之東其餘力逸勁猶飲羽於石梁夫盡精於一弓而身為之死況天下柰何其獨治也

射聊城

戰國策燕伐齊取七十餘城齊田單破燕軍復齊城唯聊城不下魯仲連乃為書著之於矢以射城中燕將得書泣三日乃自殺

傷胸

漢高帝數項羽十罪羽大怒伏弩射漢王傷胸王乃捫足曰虜中吾指

洞背

唐書太宗封劉黑闥於肥鄉有一突將勇壯絕人首衝太宗必將接太宗以天策上將大箭射之中心洞背應弦而斃遂傳此箭於北番突厥見而驚嘆

忘歸

孔叢子曰楚王張繁弱之弓載忘歸之矢以射蛟兕於

雲夢之澤

信往

趙氏兵書矢一名信往

叩輪去金

孟子鄭人使子濯孺子侵衛衛使庾公之斯追之抽矢叩輪去其金發乘矢而後反

釘柱出鏃

齊書陳顯達出杜姥宅大戰破賊矢中左眼拔箭而鏃

不出有地黃村潘姥善禁先以釘釘柱嫗禹步作氣釘  
即時出乃禁顯達目中鏃出之

中蛟

異苑永陽李增行經大谿兩蛟在水引弓射之中一則  
死增歸復出市有女子素服銜涕持所射箭增怪而問  
焉女答曰何用問為若是君箭便以相還女授矢而滅  
增反未達家暴死於路

落鴈

隋史萬歲擊尉佗見羣鴈萬歲請射第三鴈應弦而落

毒鐵

魏陳琳武庫賦矢則申息肅慎菌落空流焦銅毒鐵  
鏃

焦銅

博物志交廣山夷曰俚子其弓長數尺箭長尺餘以焦  
銅為鏑塗毒藥於鋒鏑中人即死須臾焦煎都盡唯骨  
存耳其俗誓不以法語人治法飲婦人月水及糞汁時



有差者

刀

釋名刀到也以斬伐到其所乃擊之也其末曰鋒其  
本曰環洞冥記黃帝採首山之金始鑄為刀

周器

博物志赤刀周之寶器

魯寶

穀梁傳孟勞魯之寶刀

割玉

十洲記周穆王時西胡獻昆吾劍割玉刀切玉如切泥也

引鏡

神仙傳河東孫博能引鏡為刀屈刀為鏡

刀若發硎

莊子曰庖丁曰今臣之刀十九年所解千牛矣而刀亦若新發於硎恢恢乎於其游刃必有餘地矣

刀可剃毛

淮南子曰屠牛垣一朝解九牛而刀可以剃毛又賈誼  
策屠牛垣一朝解十二牛而芒刃不頓者其排擊剝割  
皆中理解也

專諸刺僚

烈士傳專諸持剛刀置魚腹中以刺王僚

凌統報寧

見樂舞

金馬形

東漢李尤金馬書刀銘巧冶鍊剛金馬託形

白虎象

春秋繁露劒之在左青龍象也刀之在右白虎象也

金精受法

揚泉物理志阮師作刀受法於金精之靈七月庚辛見金神於冶監之門向而再拜金神授以水火之齊五精之鍊用陰陽之候取剛柔之和三年作千七百七十口

其刀平背狹刃方口洪首截輕微不絕絲髮之系所堅  
剛無有變動之異所謂百鍊利器以辟不祥懾服姦宄  
者也

火精協數

吳嘉志林古人鑄刀以五月丙午取純火精以協其數  
銅口

傳咸曰尚書舊奏給介士二百人人給大銅口刀各一  
口

金頭

謝尚與楊征南書今飾五尺金頭刀碧綾車中盾

飾以龍熊

魏曹植寶刀賦序建安中魏王命有司造寶刀五枚以龍熊鳥雀為飾太子得一余及弟饒陽侯各得一焉

號曰龍雀

赫連勃勃造銅刀為龍雀大環號曰大夏龍雀

百鍊

漢文帝造百鍊青犢漏影三寶刀

二儀

清異錄上饒葛溪鐵精而工細余中表以剪刀二柄遺贈皆交股屈環過物如風上有鑿字曰二儀

含章

魏典論太子不造百辟寶刀一曰靈寶二曰含章三曰素質又作露陌刀一名龍鱗

警惡

唐楊貴妃父楊玄琰少時嘗有一刀每出入道塗間多佩之或前有惡獸盜賊則所佩之刀鏗然有聲似警於人也故名警惡刀

鳴鴻

洞冥記漢武帝以鳴鴻刀賜東方朔

斬虎

何晏斬虎刀銘用造是器螭虎是斬又黃公能制虎後見白虎以金刀厭之不效為虎所食



故與王祥

見三公

不及文瓘

唐長史李勣入朝并州叅軍張文瓘與屬僚二人皆餞  
勣贈二人以佩刀玉帶而不及文瓘文瓘疑因以請勣  
勣曰子無嫌若某沉豫少決故贈以刀欲其果而斷也  
某放誕少檢故贈以帶欲其守約束也子才無施不可  
焉用贈

執刀賜禕

蜀費禕使吳孫權以所執寶刀賜禕禕曰刀所以討不  
庭禁暴亂者願大王勉建功業同獎王室臣雖闇弱不  
負來願

佩刀賜昝

唐太宗召試徐齊昝賜所佩金削刀

郭翻墜刀

郭翻有刀墜水人為取之因與其人其人曰我取此天

地神明所責讎終不受又投於水人又為取讎不能逆  
十倍價與之

王濬夢刀

見刺史

僧孺常用

三賢典略唐牛僧孺進士時常用麥芒刀字有誤謬隨  
手刪割點定

昌齡誤投

唐開元中王昌齡舟行馬當山遇大風命賣酒紙上大  
王誤投金錯刀忽有赤鯉入舟剖腹得刀

剗犀截鯨

魏王粲刀銘陸剗犀兕水截鯨鯢

迎雪含霜


唐盧綸割飛刀子歌曰我家有剪刀人云鬼國鐵裁羅  
裁綺無鈍時用來三年一股折南中匠人淳用鋼再令  
盤屈隨手傷改鍛割飛二刀子色迎霽雪降含霜

賚善勝刀

梁簡文帝謝勅賚善勝刀啓曰冰鐔含米雕琰表飾名  
均素質神號脫光五寶初成曹丕先荷其一善勝今造  
遇臣總被其恩韓非之書未足為比博山之筆方此更  
輕

佩大橫刀

唐王及善除右衛將軍帝曰羣臣非搜辟不得至朕所  
爾佩大橫刀在朕側亦知此官貴乎



山堂肆考卷一百七十八